

大明太宗皇帝御制藏經贊

朕惟如來為一大事出現演三

藏十二部之玄言所以指教垂

義者尚矣自其言流于中土翻

譯其義以化導群類非上根圓

智之士鮮能以通之而得其要

者或寡矣天治心

道心也者虛靈明

該貫萬理而無所

多聞必由於藏海

於一心以是修證超乎圓妙常

住不動無有所蔽此誠末世之

津梁迷途之明炬也朕撫臨大

統仰承鴻基念皇考皇妣生育

之恩垂緒之德劬勞莫報乃遣

使往西土取藏經之文刊梓印

佛

藏

贊以願轉

施以資為薦揚之典下界一切

生靈均沾無窮之福如是功德

有不可名言若夫世之由迷惑

真交纏故業茫然而莫之所歸

者不究竟於斯亦莫能得其體

而返其真也推是心以濟拔流

來慈悲之

于卷首且

如來演義諦

法音遍克周

世界恒河沙

一一皆具足

化導於群類

咸得成正觀

有漏諸微塵

悉超於覺海

歷阿僧祇劫

廣開方便門

迷妄執空華

一切了明微

有一弗微者

誓不成佛陀

我今念眾生

是故廣演說

深心奉獻刹

俱願澄善提

上報三重恩

下濟諸途苦

普登無上覺

欲漏盡消除

成就勝妙心

以拯諸末劫

廣此密因義

布施於竺乾

頻伽大梵音

至少不思議

如十方擊鼓

無礙於音聲

有耳皆獲聞

聞者即成覺

堅固無動轉

永不墮輪回

世尊為證明

作如是贊嘆

功德不可說

永被於生靈

永樂八年三月初九日

佛藏

上海世紀出版股份有限公司上海書店
時代出版傳媒股份有限公司黃山書社

第二〇冊目錄

大方廣圓覺修多羅了義經	一卷	唐佛陀多羅譯	(難七)		一
佛說施燈功德經	一卷	高齊那連提黎耶舍譯	(難八)		一五
金剛三昧經	二卷	北凉失譯師名	(難九—十)		二一
觀佛三昧海經	十卷	東晉佛陀跋陀羅譯	(量一—十)		三四
大方便佛報恩經	七卷	後漢失譯師名	(墨一—七)		一〇八
菩薩本行經	三卷	東晉失譯師名	(墨八—十)		一六七
菩薩處胎經	五卷	姚秦竺佛念譯	(悲一—五)		一八九
央掘魔羅經	四卷	劉宋求那跋陀羅譯	(悲六—九)		二四六
菩薩內習六波羅蜜經	一卷	後漢嚴佛調譯	(悲十)		二八六
菩薩投身飼餓虎起塔因緣經	一卷	北凉法盛譯	(悲十)		二八七
三昧弘道廣顯定意經	四卷	西晉竺法護譯	(絲一—四)		二九二
佛說明度五十校計經	二卷	後漢安世高譯	(絲五—六)		三一七
無所有菩薩經	四卷	隋闍那崛多等譯	(絲七—十)		三三六
大法鼓經	二卷	劉宋求那跋陀羅譯	(染一—二)		三六七
月上女經	二卷	隋闍那崛多譯	(染三—四)		三八一

文殊師利問經	二卷	梁僧伽婆羅譯	(染五——六)	三九四
大方廣如來秘密藏經	二卷	二秦失譯師名	(染七)	四一八
大乘密嚴經	三卷	唐地波訶羅譯	(染八——十)	四二九
菩薩瓔珞經	二十卷	姚秦竺佛念譯	(詩一——讚十)	四五七
大佛頂如來密因修證了義諸菩薩萬行首楞嚴經	十卷	唐般刺密帝譯		
(羔一——十)				六二五
七佛所說神咒經	四卷	東晉失譯師名	(羊一——四)	六九〇
文殊師利寶藏陀羅尼經	一卷	唐菩提流志譯	(羊五)	七二四
僧伽吒經	四卷	東魏月婆首那譯	(羊六——八)	七三七
出生菩提心經	一卷	隋闍那崛多等譯	(羊九)	七六〇
佛說佛印三昧經	一卷	後漢安世高譯	(羊九)	七六六
佛說十二頭陀經	一卷	劉宋求那跋陀羅譯	(羊十)	七六八
佛說樹提伽經	一卷	劉宋求那跋陀羅譯	(羊十)	七七〇
佛說法常住經	一卷	西晉失譯師名	(羊十)	七七一
佛說長壽王經	一卷	西晉失譯師名	(羊十)	七七二
佛說海龍王經	四卷	西晉竺法護譯	(景一——四)	七七四
佛爲海龍王說法印經	一卷	唐義淨譯	(景五)	八〇九
佛說右遶佛塔功德經	一卷	唐實叉難陀譯	(景五)	八一〇

佛說妙色王因緣經	一卷	唐義淨譯	(景五)		八一
師子素馱娑王斷肉經	一卷	唐智嚴譯	(景五)		八一
佛說差摩婆帝受記經	一卷	元魏菩提留支譯	(景五)		八一
佛說師子莊嚴王菩薩請問經	一卷	唐那提譯	(景五)		八一
中陰經	二卷	姚秦竺佛念譯	(景六一—七)		八一

大方廣圓覺修多羅了義經略疏序 難七

唐高麗王使臣金剛智大師奉詔撰述

夫血氣之屬必有知凡有知者必同體所謂真淨明妙虛徹靈通卓然而獨存者也是衆生之本源故曰心地是諸佛之所得故曰菩提交徹融攝故曰法界寂靜常樂故曰涅槃不濁不漏故曰清淨不妄不變故曰真如離過絕非故曰佛性護善遮惡故曰總持隱覆含攝故曰如來藏超越玄闊故曰密嚴國統衆德而大備燦羣昏而獨照故曰圓覺其實皆一心也背之則凡順之則聖迷之則生死始悟之則輪迴息親而求之則止觀定慧推而廣之則六度萬行引而爲智然後爲正智依而爲因然後爲正因其實皆一法也終日圓覺而未嘗圓覺者凡夫也欲證圓覺而未極圓覺者菩薩也具足圓覺而住持圓覺者如來也離圓覺無六道捨圓覺無三乘非圓覺無如來泯圓覺無真法其實皆一道也三世諸佛之所證蓋證此也如來爲一大事出現蓋爲此也三藏十二部一切修多羅蓋詮

此也然如來垂教指法有顯密立義有廣略乘時有先後當機有深淺非上根圓智其孰能大通之故如來於光明藏與十二大士密說而顯演潛通而廣被以印定其法爲一切經之宗也圭峯禪師得法於荷澤嫡孫南印上足道圓和尚一日隨衆僧齋于州民任灌

家居下位以次受經遇圓覺了義卷末終軸感悟流涕歸以所悟告其師師撫之曰汝當大弘圓頓之教此經諸佛授汝耳禪師既佩南宗密印受圓覺懸記於是閱大藏經律通唯識起信等論然後頓轡於華嚴法界冥坐於圓覺妙場究一雨之所霑窮五教之殊致乃爲之疏解凡大疏三卷入鈔十三卷略疏兩卷小鈔六卷道場修證儀一十八卷並行於世其叙教也圓其見法也徹其釋義也端如析薪新其入觀也明若秉燭其辭也極於理而已不虛騁其文也扶於教而已不苟飾不以其所長病八故無排斥之說不以其未至蓋人故無冒臆之論蕩蕩然貫十二部經之眼目三十五祖之骨髓生靈之大本三世之

達道後世雖有作者不能過矣其四依之一乎或淨土之親聞乎何盡其義味如此也或曰道無形視者莫能觀道無方行者莫能至況文字乎在性之而已豈區區數萬言而可詮之哉對曰意是不足以語道也前不云乎統衆德而大備燦羣昏而獨照者圓覺也蓋圓覺能出一切法一切法未嘗離圓覺今天經律論三藏之文傳于中國者五千餘卷其所詮者何也戒定慧而已修戒定慧而求者何也圓覺而已圓覺一法也張萬行而求之者何衆生之根器異也然則大藏皆圓覺之經此疏乃大藏之疏也羅五千軸之文而以數卷之疏通之豈不至簡哉何言其繁也及其斷言語之道息思想之心忘能所滅影像然後爲得也固不在詮表耳嗚呼生靈之所以往來者六道也鬼神沉幽愁之苦鳥獸懷猶戒之悲修羅方瞋諸天正樂可以整心慮趣菩提唯人道爲能耳人而不爲吾末如之何也已矣休常遊禪師之閭域受禪師之願訣無以自効輒直讚其法而普告大衆耳其

他備手本序 云云

略疏序

終南山草堂寺沙門宗密述

元亨利貞乾之德也始於一氣常樂我淨佛之德也本乎一心專一氣而致柔修一心而成道心也者冲虚妙粹炳煥靈明無去無來冥通三際非中非外洞徹十方不滅不生豈四山之可害離性離相奚五色之能盲處生死流驪珠獨耀於滄海踞涅槃岸挂輪孤朗於碧天大矣哉萬法資始也萬法虛偽緣會而生生法本無一切唯識識如幻夢但是一心心寂而知目之圓覺彌滿清淨中不容他故德用無邊皆同一性性起爲相境智歷然相得性融身心廓爾方之海印越彼太虛恢恢焉晃晃焉迥出思議之表也我佛證此愍物迷之再歎奇哉三思大事既全十力能摧

樹下魔軍妄起四心欲示宅中寶藏然迷頭捨父悟有易難故仙苑覺場教興頓漸漸設五時之異空有迭彰頓無二諦之殊幽靈絕待今此經者頓之類歟故如來入寂光土凡聖一源現受用身主伴同會曼殊大士創問本起之因薄伽至尊首提究竟之果照斯真體滅彼夢形知無我人誰受輪轉種種幻化生於覺心幻盡覺圓心通法徧心本是佛由念起而漂流沉岸實不移因舟行而驚驟頓除妄宰空不生華漸竭愛源金無重鑛理絕修證智似階差覺前前非名後後位況妄忘起滅德等圓明者焉然出廐良駒已搖鞭影埋塵大寶須設治方故三觀澄明真假俱入諸輪綺五單複圓修四相潛神非覺違拒四病出體心華發明復令長中下期克念攝念而加行別徧互習業障惑障而銷土成就慧身靜極覺徧百千世界佛境現前是以聞五種名超剎寶施福說半偈義勝河沙小乘寔由無法不持無機不被者也噫已歎和衆似量騰於核心雪曲應稀了我匪於龍藏宗密

尊魯詰冠討竺墳俱溺筌筌唯味糟粕幸於涪上針芥相投禪遇南宗教逢斯典一言之下心地開通一軸之中義天朗耀頃以道非常道諸行無常今知心是佛心定當作佛然佛稱種智修假多聞故復行詣百城坐探羣籍講雖濫泰學且師安叨休猶吾之納謬當真子之叩再逢親友彌感佛恩久慨孤貧將陳法施採集般若給實華嚴提挈毗尼發明唯識然醫方萬品宜選對治海寶千般先求如意觀夫文富義博誠讓雜華指體投機無偕圓覺故叅詳諸論反復百家以利其器方爲疏解冥心聖旨極思研精義備性相禪兼頓漸勒成三卷以傳強學然上中下品根欲性殊今將法彼曲成從其易簡更搜精要直注本經庶即事即心日益日損者矣

大方廣圓覺修多羅了義經

唐 獨宿 沙門 佛陀 多羅 譯

如是我聞一時婆伽婆入於神通大光明藏三昧正受一切如來光嚴住持是諸衆生清淨覺地身心寂滅平等本際圓滿十方不二

隨順於不二境現諸淨土與大菩薩摩訶薩
十萬人俱其名曰文殊師利菩薩普賢菩薩
普眼菩薩金剛藏菩薩彌勒菩薩清淨慧菩
薩威德自在菩薩辯音菩薩淨諸業障菩薩
普覺菩薩圓覺菩薩賢善首菩薩等而爲上
首與諸眷屬皆入三昧同住如來平等法會
於是文殊師利菩薩在大衆中即從座起頂
禮佛足右繞三匝長跪叉手而白佛言大悲
世尊願爲此會諸來法衆說於如來本起清
淨因地法行及說菩薩於大衆中發清淨心
遠離諸病能使未來末世衆生求大乘者不
墮邪見作是語已五體投地如是三請終而
復始爾時世尊告文殊師利菩薩言善哉善
哉善男子汝等乃能爲諸菩薩諮詢如來因
地法行及爲末世一切衆生求大乘者得正
住持不墮邪見汝今諦聽當爲汝說時文殊
師利菩薩奉教歡喜及諸大衆默然而聽善
男子無上法王有大陀羅尼門名爲圓覺流
出一切清淨真如菩提涅槃及波羅蜜教授
菩薩一切如來本起因地皆依圓照清淨覺

相永斷無明方成佛道云何無明善男子一
切衆生從無始來種種顛倒猶如迷人四方
易處妄認四大爲自身相六塵緣影爲自心
相譬彼病目見空中華及第二月善男子空
實無華病者妄執由妄執故非唯惑此虛空
自性亦復迷彼實華生處由此妄有輪轉生
死故名無明善男子此無明者非實有體如
夢中人夢時非無及至於醒了無所得如衆
空華滅於虛空不可說言有定滅處何以故
無生處故一切衆生於無生中妄見生滅是
故說名輪轉生死善男子如來因地修圓覺
者知是空華即無輪轉亦無身心受彼生死
非作故無本性無故彼知覺者猶如虛空知
虛空者即空華相亦不可說無知覺性有無
俱遣是則名爲淨覺隨順何以故虛空性故
常不動故如來藏中無起滅故無知見故如
法界性究竟圓滿徧十方故是則名爲因地
法行菩薩因此於大衆中發清淨心末世衆
生依此修行不墮邪見爾時世尊欲重宣此
義而說偈言

文殊汝當知一切諸如來從於本因地
皆以智慧覺了達於無明知彼如空華
即能免流轉又如夢中人醒時不可得
覺者如虛空平等不動轉覺徧十方界
即得成佛道衆幻滅無處成道亦無得
本性圓滿故菩薩於此中能發菩提心
末世諸衆生修此免邪見
於是普賢菩薩在大衆中即從座起頂禮佛
足右繞三匝長跪叉手而白佛言大悲世尊
願爲此會諸菩薩衆及爲末世一切衆生修
大乘者聞此圓覺清淨境界云何修行世尊
若彼衆生知如幻者身心亦幻云何以幻還
修於幻若諸幻性一切盡滅則無有心誰爲
修行云何復說修行如幻若諸衆生本不修
行於生死中常居幻化曾不了知如幻境界
今妄想心云何解脫願爲末世一切衆生作
何方便漸次修習令諸衆生永離諸幻作是
語已五體投地如是三請終而復始爾時世
尊告普賢菩薩言善哉善哉善男子汝等乃
能爲諸菩薩及末世衆生修習菩薩如幻三

昧方便漸次令諸眾生得離諸幻故今諦聽當為汝說時普賢菩薩奉教歡喜及諸大眾默然而聽善男子一切眾生種種幻化皆生如來圓覺妙心猶如空華從空而有幻華雖滅空性不壞眾生幻心還依幻滅諸幻盡滅覺心不動依幻說覺亦名為幻若說有覺猶未離幻說無覺者亦復如是是故幻滅名為不動善男子一切菩薩及末世眾生應當遠離一切幻化虛妄境界由堅執持遠離心故心如幻者亦復遠離遠離為幻亦復遠離離遠離幻亦復遠離得無所離即除諸幻譬如鑽火兩木相因火出木盡灰飛煙滅以幻修幻亦復如是諸幻雖盡不入斷滅善男子知幻即離不作方便離幻即覺亦無漸次一切菩薩及末世眾生依此修行如是乃能永離諸幻爾時世尊欲重宣此義而說偈言

普賢汝當知 一切諸眾生 無始幻無明 皆從諸如來 圓覺心建立 猶如虛空華 依空而有相 空華若復滅 虛空本不動 幻從諸覺生 幻滅覺圓滿 覺心不動故

若彼諸菩薩 及末世眾生 常應遠離幻 諸幻悉皆離 如木中生火 木盡火還滅 覺則無漸次 方便亦如是

於是普眼菩薩在大眾中即從座起頂禮佛足右繞三匝長跪叉手而白佛言大悲世尊願為此會諸菩薩眾及為末世一切眾生演說菩薩修行漸次云何思惟云何住持眾生未悟作何方便普令開悟世尊若彼眾生無正方便及正思惟聞佛如來說此三昧心生迷悶則於圓覺不能悟入願興慈悲為我等輩及末世眾生假說方便作是語已五體投地如是三請終而復始爾時世尊告普眼菩薩言善哉善哉善男子汝等乃能為諸菩薩及末世眾生問於如來修行漸次思惟住持乃至假說種種方便汝今諦聽當為汝說時

普眼菩薩奉教歡喜及諸大眾默然而聽善男子彼新學菩薩及末世眾生欲求如來淨圓覺心應當正念遠離諸幻先依如來奢摩他行堅持禁戒安處徒眾宴坐靜室恒作是念我今此身四大和合所謂髮毛爪齒皮肉

筋骨髓腦垢色皆歸於地唾涕膿血津淚涎沫痰涎精氣大小便利皆歸於水煖氣歸火動轉歸風四大各離今者妄身當在何處即知此身畢竟無體和合為相實同幻化四緣假合妄有六根六根四大中外合成妄有緣氣於中積聚似有緣相假名為心善男子此虛妄心若無六塵則不能有四大分解無塵可得於中緣塵各歸散滅畢竟無有緣心可見善男子彼之眾生幻身滅故幻心亦滅幻心滅故幻塵亦滅幻塵滅故幻滅亦滅幻滅滅故非幻不滅譬如磨鏡垢盡明現善男子當知身心皆為幻垢垢相永滅十方清淨善男子譬如清淨摩尼寶珠映於五色隨方各現諸愚癡者見彼摩尼寶珠有五色善男子圓覺淨性現於身心隨類各應彼愚癡者說淨圓覺實有如是身心自相亦復如是由此不能遠於幻化是故我說身心幻垢對離幻垢說名菩薩垢盡對除即無對垢及說名者善男子此菩薩及末世眾生證得諸幻滅影像故爾時便得無方清淨無邊虛空覺所顯發

覺圓明故顯心清淨心清淨故見塵清淨見清淨故眼根清淨根清淨故眼識清淨識清淨故聞塵清淨聞清淨故耳根清淨根清淨故耳識清淨識清淨故覺塵清淨如是乃至鼻舌身意亦復如是善男子根清淨故色塵清淨色清淨故聲塵清淨香味觸法亦復如是善男子六塵清淨故地大清淨地清淨故水大清淨火大風大亦復如是善男子四大清淨故十二處十八界二十五有清淨彼清淨故十力四無所畏四無礙智佛十八不共

法三十七助道品清淨如是乃至八萬四千陀羅尼門一切清淨善男子一切實相性清淨故一身清淨一身清淨故多身清淨多身清淨故如是乃至十方衆生圓覺清淨善男子一世界清淨故多世界清淨多世界清淨故如是乃至盡於虛空圓裹三世一切平等清淨不動善男子虛空如是平等不動當知覺性平等不動四大不動故當知覺性平等不動如是乃至八萬四千陀羅尼門平等不動當知覺性平等不動善男子覺性徧滿清

淨不動圓無際故當知六根徧滿法界根徧滿故當知六塵徧滿法界塵徧滿故當知四大徧滿法界如是乃至陀羅尼門徧滿法界善男子白彼妙覺性徧滿故根性塵性無壞無雜根塵無壞故如是乃至陀羅尼門無壞無雜如百千燈光照一室其光徧滿無壞無雜善男子覺成就故當知菩薩不與法縛不求法脫不取生死不受涅槃不敬持戒不憎毀禁不重久習不輕初學何以故一切覺故譬如眼光曉了前境其光圓滿得無憎愛何

以故光體無二無憎愛故善男子此菩薩及末世衆生修習此心得成就者於此無修亦無成就圓覺普照寂滅無二於中百千萬億阿僧祇不可說恒河沙諸佛世界猶如空華亂起亂滅不即不離無縛無脫始知衆生本來成佛生死涅槃猶如昨夢善男子如昨夢故當知生死及與涅槃無起無滅無來無去其所證者無得無失無取無捨其能證者無作無止無任無滅於此證中無能無所畢竟無證亦無證者一切法性平等不壞善男子

彼諸菩薩如是修行如是漸次如是思惟如是住持如是方便如是開悟求如是法亦不迷悶爾時世尊欲重宣此義而說偈言
普眼汝當知 一切諸衆生 身心皆如幻 身相屬四大 心性歸六塵 四大體各離 誰爲和合者 如是漸修行 一切悉清淨 不動徧法界 無作止任滅 亦無能證者 一切佛世界 猶如虛空華 三世悉平等 畢竟無來去 初發心菩薩 及末世衆生 欲求入佛道 應如是修習

於是金剛藏菩薩在大衆中即從座起頂禮佛足右繞三匝長跪叉手而白佛言大悲世尊善爲一切諸菩薩衆宣揚如來圓覺清淨大陀羅尼因地法行漸次方便與諸衆生開發蒙昧在會法衆承佛慈誨幻翳朗然慧目清淨世尊若諸衆生本來成佛何故復有一切無明若諸無明衆生本有何因緣故如來復說本來成佛十方異生本成佛道後起無明一切如來何時復生一切煩惱惟願不捨無遮大慈爲諸菩薩開秘密藏及爲末世一

切眾生得聞如是修多羅教了義法門永斷疑悔作是語已五體投地如是三請終而復始爾時世尊告金剛藏菩薩言善哉善哉善男子汝等乃能為諸菩薩及末世眾生問於如來甚深祕密究竟方便是諸菩薩最上教誨了義大乘能使十方修學菩薩及諸末世一切眾生得決定信永斷疑悔汝今諦聽當為汝說時金剛藏菩薩奉教歡喜及諸大眾默然而聽善男子一切世界始終生滅前後有無聚散起止念念相續循環往復種種取捨皆是輪迴未出輪迴而辯圓覺彼圓覺性即同流轉若免輪迴無有是處譬如動目能搖湛水又如定眼由迴轉火雲駛月運舟行岸移亦復如是善男子諸旋未息彼物先住尚不可得何況輪轉生死垢心曾未清淨觀佛圓覺而不旋復是故汝等便生三惑善男子譬如幻翳妄見空華幻翳若除不可說言此翳已滅何時更起一切諸翳何以故翳華二法非相待故亦如空華滅於空時不可說言虛空何時更起空華何以故空本無華非

起滅故生死涅槃同於起滅妙覺圓照離於華翳善男子當知虛空非是暫有亦非暫無況復如來圓覺隨順而為虛空平等本性善男子如銷金鑛金非銷有既已成金不重為鑛經無窮時金性不壞不應說言本非成就如來圓覺亦復如是善男子一切如來妙圓覺心本無菩提及與涅槃亦無成佛及不成佛無妄輪迴及非輪迴善男子但諸聲聞所圓境界身心語言皆悉斷滅終不能至彼之親證所現涅槃何況能以有思惟心測度如來圓覺境界如取螢火燒須彌山終不能著以輪迴心生輪迴見入於如來大寂滅海終不能至是故我說一切菩薩及末世眾生先斷無始輪迴根本善男子有作思惟從有起皆是六塵妄想緣氣非實心體已如空華用此思惟辯於佛境猶如空華復結空果展轉妄想無有是處善男子虛妄浮心多諸巧見不能成就圓覺方便如是分別非為正問爾時世尊欲重宣此義而說偈言

若以輪迴心 思惟即旋復 但至輪迴際 不能入佛海 譬如銷金鑛 金非銷故有 雖復本來金 終以銷成就 一成真金體 不復重為鑛 生死與涅槃 凡夫及諸佛 同為空華相 思惟猶幻化 何況詰虛妄 若能了此心 然後求圓覺 於是彌勒菩薩在大眾中即從座起頂禮佛足右繞三匝長跪叉手而白佛言大悲世尊廣為菩薩開祕密藏令諸大眾深悟輪迴分別邪正能施末世一切眾生無畏道眼於大涅槃生決定信無復重隨輪轉境界起循環見世尊若諸菩薩及末世眾生欲遊如來大寂滅海云何當斷輪迴根本於諸輪迴有幾種性修佛菩提幾等差別迴入塵勞當設幾種教化方便度諸眾生惟願不捨救世大悲令諸修行一切菩薩及末世眾生慧目肅清照耀心鏡圓悟如來無上知見作是語已五體投地如是三請終而復始爾時世尊告彌勒菩薩言善哉善哉善男子汝等乃能為諸菩薩及末世眾生請問如來深奧祕密微妙

之義今諸菩薩潔清慧目及令一切末世衆生永斷輪迴心悟實相具無生忍汝今諦聽當爲汝說時彌勒菩薩奉教歡喜及諸大衆默然而聽善男子一切衆生從無始際由有種種恩愛貪欲故有輪迴若諸世界一切種性卵生胎生濕生化生皆因婬欲而正性命當知輪迴愛爲根本由有諸欲助發愛性是故能令生死相續欲因愛生命因欲有衆生愛命還依欲本愛欲爲因愛命爲果由於欲境起諸違順境背愛心而生憎嫉造種種業是故復生地獄餓鬼知欲可厭愛欲業道捨惡樂善復現天人又知諸愛可厭惡故棄愛樂捨還滋愛本便現有爲增上善果皆輪迴故不成聖道是故衆生欲脫生死免諸輪迴先斷貪欲及除愛渴善男子菩薩變化示現世間非愛爲本但以慈悲令彼捨愛假諸貪欲而入生死若諸末世一切衆生能捨諸欲及除憎愛永斷輪迴勤求如來圓覺境界於清淨心便得開悟善男子一切衆生由本貪欲發揮無明顯出五性差別不等依二種障

而現深淺云何二障一者理障礙正知見二者事障續諸生死云何五性善男子若此二障未得斷滅名未成佛若諸衆生永捨貪欲先除事障未斷理障但能悟入聲聞緣覺未能顯住菩薩境界善男子若諸末世一切衆生欲汎如來大圓覺海先當發願勤斷二障二障已伏即能悟入菩薩境界若事理障已永斷滅即入如來微妙圓覺滿足菩提及大涅槃善男子一切衆生皆證圓覺達善知識依彼所作因地法行爾時修習便有頓漸若遇如來無上菩提正修行路根無大小皆成佛果若諸衆生雖求善友遇邪見者未得正悟是則名爲外道種性邪師過謬非衆生咎是名衆生五性差別善男子菩薩唯以大悲方便入諸世間開發未悟乃至示現種種形相逆順境界與其同事化令成佛皆依無始清淨願力若諸末世一切衆生於大圓覺起增上心當發善願清淨大願應作是言願我今者住佛圓覺求善知識莫值外道及與二乘依願修行漸斷諸障障盡願滿便登解脫

清淨法殿證大圓覺妙莊嚴域爾時世尊欲重宣此義而說偈言
彌勒汝當知 一切諸衆生 不得大解脫 皆由貪欲故 墮落於生死 若能斷憎愛 及與貪瞋癡 不因差別性 皆得成佛道
二障永消滅 求師得正悟 隨順菩薩願 依止大涅槃 十方諸菩薩 皆以大悲願 示現入生死 現在修行者 及末世衆生 勤斷諸愛見 便歸大圓覺
於是清淨慧菩薩在大衆中即從座起頂禮佛足右繞三匝長跪叉手而白佛言大悲世尊爲我等輩廣說如是不思議事本所不見本所不聞我等今者蒙佛善誘身心泰然得大饒益願爲諸來一切法衆重宣法王圓滿覺性一切衆生及諸菩薩如來世尊所證所得云何差別令末世衆生聞此聖教隨順開悟漸次能入作是語已五體投地如是三請終而復始爾時世尊告清淨慧菩薩言善哉善哉善男子汝等乃能爲末世衆生請問如來漸次差別汝今諦聽當爲汝說時清淨慧

菩薩奉教歡喜及諸大眾默然而聽善男子
圓覺自性非性性有循諸性起無取無證於
實相中實無菩薩及諸衆生何以故菩薩衆
生皆是幻化幻化滅故無取證者譬如眼根
不見眼性自平等無平等者衆生迷倒未
能除滅一切幻化於滅未滅妄功用中便顯
差別若得如來寂滅隨順實無寂滅及寂滅
者善男子一切衆生從無始來由妄想我及
愛我者曾不自知念念生滅故起憎愛耽著
五欲若遇善友教令開悟淨圓覺性發明起
滅即知此生性自勞慮若復有人勞慮永斷
得法界淨即彼淨解為自障礙故於圓覺而
不自在此名凡夫隨順覺性善男子一切菩
薩見解為礙雖斷解礙猶住見覺覺礙為礙
而不自在此名菩薩未入地者隨順覺性善
男子有照有覺俱名障礙是故菩薩常覺不
住照與照者同時寂滅譬如有人自斷其首
首已斷故無能斷者則以礙心自滅諸礙礙
已斷滅無礙礙者修多羅教如標月指若復
見月了知所標畢竟非月一切如來種種言

說開示菩薩亦復如是此名菩薩已入地者
隨順覺性善男子一切障礙即究竟覺得念
失念無非解脫成法破法皆名涅槃智慧慈
癡通為般若菩薩外道所成就法同是菩提
無明真如無異境界諸戒定慧及姪怒癡俱
是梵行衆生國土同一法性地獄天宮皆為
淨土有性無性齊成佛道一切煩惱畢竟解
脫法界海慧照了諸相猶如虛空此名如來
隨順覺性善男子但諸菩薩及末世衆生居
一切時不起妄念於諸妄心亦不息滅住妄
想境不加了知於無了知不辯真實彼諸衆
生聞是法門信解受持不生驚畏是則名為
隨順覺性善男子汝等當知如是衆生已曾
供養百千萬億恒河沙諸佛及大菩薩植衆
德本佛說是人名為成就一切種智爾時世
尊欲重宣此義而說偈言
清淨慧當知 圓滿菩提性 無取亦無證
無著薩衆生 覺與未覺時 漸次有差別
衆生為解礙 菩薩未離覺 入地永寂滅
不住一切相 大覺悉圓滿 名為徧隨順

末世諸衆生 心不生虛妄 佛說如是人
現世即菩薩 供養恒沙佛 功德已圓滿
雖有多方便 皆名隨順智
於是威德自在菩薩在大衆中即從座起頂
禮佛足右繞三匝長跪叉手而白佛言大悲
世尊廣為我等分別如是隨順覺性令諸菩
薩覺心光明承佛圓音不因修習而得善利
世尊譬如大城外有四門隨方來者非止一
路一切菩薩莊嚴佛國及成菩提非一方便
惟願世尊廣為我等宣說一切方便漸次并
修行人總有幾種令此會菩薩及末世衆生
求大乘者速得開悟遊戲如來大寂滅海作
是語已五體投地如是三請終而復始爾時
世尊告威德自在菩薩言善哉善哉善男子
汝等乃能為諸菩薩及末世衆生問於如來
如是方便汝今諦聽當為汝說時威德自在
菩薩奉教歡喜及諸大眾默然而聽善男子
無上妙覺徧諸十方出生如來與一切法同
體平等於諸修行實無有二方便隨順其數
無量圓攝所歸徧性差別當有三種善男子

若諸菩薩悟淨圓覺以淨覺心取靜為行由澄諸念覺識動靜慧發生身心客塵從此永滅便能內發寂靜輕安由寂靜故十方世界諸如來心中顯現如鏡中像此方便者名奢摩他善男子若諸菩薩悟淨圓覺以淨

覺心知覺心性^七及與根塵皆因幻化即起諸幻以除幻者變化諸幻而聞幻眾由起幻故便能內發大悲輕安一切菩薩從此起行漸次增進彼觀幻者非同幻故非同幻觀皆是幻故幻相永離是諸菩薩所圓妙行如土長

苗此方便者名三摩鉢提善男子若諸菩薩悟淨圓覺以淨覺心不取幻化及諸靜相了知身心皆為墨礙無知覺明不依諸礙永得超過礙無礙境受用世界及與身心相在塵域如器中鎗聲出于外煩惱涅槃不留礙便能內發寂滅輕安妙覺隨順寂滅境界自他身心所不能及衆生壽命皆為淨想此方便者名為禪那善男子此三法門皆是圓覺親近隨順十方如來因此成佛十方菩薩種種方便一切同異皆依如是三種事業若得

圓證即成圓覺善男子假使人修於聖道教化成就百千萬億阿羅漢辟支佛果不如有人聞此圓覺無礙法門一刹那頃隨順修習爾時世尊欲重宣此義而說偈言

威德汝當知 無上大覺心 本際無二相

隨順諸方便 其數即無量 如來總開示

便有三種類 寂靜奢摩他 如鏡照諸像

如幻三摩提 如苗漸增長 禪那唯寂滅

如彼器中鎗 三種妙法門 皆是覺隨順

十方諸如來 及諸大菩薩 因此得成道

三事圓證故 名究竟涅槃

於是辯音菩薩在大衆中即從座起頂禮佛

足右繞三匝長跪叉手而白佛言大悲世尊

如是法門甚為希有世尊此諸方便一切菩薩於圓覺門有幾修習願為大衆及末世衆

生方便開示令悟實相作是語已五體投地

如是三請終而復始爾時世尊告辯音菩薩

言善哉善哉善男子汝等乃能為諸大衆及末世衆生問於如來如是修習汝今諦聽當為汝說時辯音菩薩奉教歡喜及諸大衆默

然而聽善男子一切如來圓覺清淨本無修習及修習者一切菩薩及末世衆生依於未覺幻力修習爾時便有二十五種清淨定輪若諸菩薩唯取極靜由靜力故永斷煩惱究竟成就不起于座便入涅槃此菩薩者名單

修奢摩他若諸菩薩唯觀如幻以佛力故變化世界種種作用備行菩薩清淨妙行於陀羅尼不失寂念及諸靜慧此菩薩者名單修三摩鉢提若諸菩薩唯滅諸幻不取作用獨斷煩惱煩惱斷盡便證實相此菩薩者名單

修禪那若諸菩薩先取至靜以靜慧心照諸幻者便於是中起菩薩行此菩薩者名先修奢摩他後修三摩鉢提若諸菩薩以靜慧故證至靜性便斷煩惱永出生死此菩薩者名先修奢摩他後修禪那若諸菩薩以寂靜慧

復現幻力種種變化度諸衆生後斷煩惱而入寂滅此菩薩者名先修奢摩他中修三摩鉢提後修禪那若諸菩薩以至靜力斷煩惱已後起菩薩清淨妙行度諸衆生此菩薩者名先修奢摩他中修禪那後修三摩鉢提若

諸菩薩以至靜力心斷煩惱復度衆生建立世界此菩薩者名先修奢摩他齊修三摩鉢提禪那若諸菩薩以至靜力資發變化後斷煩惱此菩薩者名齊修奢摩他三摩鉢提後修禪那若諸菩薩以至靜力用資寂滅後起作用變化世界此菩薩者名齊修奢摩他禪那後修三摩鉢提若諸菩薩以變化力種種隨順而取至靜此菩薩者名先修三摩鉢提後修奢摩他若諸菩薩以變化力種種境界而取寂滅此菩薩者名先修三摩鉢提後修禪那若諸菩薩以變化力而作佛事安住寂靜而斷煩惱此菩薩者名先修三摩鉢提中修奢摩他後修禪那若諸菩薩以變化力無礙作用斷煩惱故安住至靜此菩薩者名先修三摩鉢提中修禪那後修奢摩他若諸菩薩以變化力方便作用至靜寂滅二俱隨順此菩薩者名先修三摩鉢提齊修奢摩他禪那若諸菩薩以變化力種種起用資於至靜後斷煩惱此菩薩者名齊修三摩鉢提奢摩他後修禪那若諸菩薩以變化力資於寂滅

後住清淨無作靜慮此菩薩者名齊修三摩鉢提禪那後修奢摩他若諸菩薩以寂滅力而起至靜住於清淨此菩薩者名先修禪那後修奢摩他若諸菩薩以寂滅力而起作用於一切境寂用隨順此菩薩者名先修禪那後修三摩鉢提若諸菩薩以寂滅力種種自性安於靜慮而起變化此菩薩者名先修禪那中修奢摩他後修三摩鉢提若諸菩薩以寂滅力無作自性起於作用清淨境界歸於靜慮此菩薩者名先修禪那中修三摩鉢提後修奢摩他若諸菩薩以寂滅力種種清淨而住靜慮起於變化此菩薩者名先修禪那齊修奢摩他三摩鉢提若諸菩薩以寂滅力資於至靜而起變化此菩薩者名齊修禪那奢摩他後修三摩鉢提若諸菩薩以寂滅力資於變化而起至靜清明境慧此菩薩者名齊修禪那三摩鉢提後修奢摩他若諸菩薩以圓覺慧圓合一切於諸性相無離覺性此菩薩者名為圓修三種自性清淨隨順善男子是名菩薩二十五輪一切菩薩修行如是

若諸菩薩及末世衆生依此輪者當持梵行寂靜思惟求哀懺悔經三七日於二十五輪各安標記至心求哀隨手結取依結開示便知頓漸一念疑悔即不成就爾時世尊欲重宣此義而說偈言

辯音汝當知 一切諸菩薩 無礙清淨慧 皆依禪定生 所謂奢摩他 三摩提禪那 三法頓漸修 有二十五種 十方諸如來 三世修行者 無不因此法 而得成菩提 唯除頓覺人 弁法不隨順 一切諸菩薩 及末世衆生 常當持此輪 隨順勤修習 依佛大悲力 不久證涅槃

於是淨諸業障菩薩在大衆中即從座起頂禮佛足右繞三匝長跪叉手而白佛言大悲世尊爲我等輩廣說如是不思議事一切如來因地行相今諸大衆得未曾有親見調御摩怛沙劫勤苦境界一切功用猶如一念我等菩薩深自慶慰世尊若此覺心本性清淨因何染汙使諸衆生迷悶不入惟願如來廣爲我等開悟法性令此大衆及末世衆生作

將來眼作是語已五體投地如是三請終而復始爾時世尊告淨諸業障菩薩言善哉善哉善男子汝等乃能為諸大衆及末世衆生諮問如來如是方便汝今諦聽當為汝說時淨諸業障菩薩奉教歡喜及諸大衆默然而聽善男子一切衆生從無始來妄想執有我人衆生及與壽命認四顛倒為實我體由此便生憎愛二境於虛妄體重執虛妄二妄相依生妄業道有妄業故妄見流轉厭流轉者妄見涅槃由此不能入清淨覺非覺違拒諸能入者有諸能入非覺入故是故動念及與息念皆歸迷悶何以故由有無始本起無明為己主宰一切衆生無慧目身心等性皆是無明譬如有人不自斷命是故當知有愛我者我與隨順非隨順者便生憎怨為憎愛心養無明故相續求道皆不成就善男子云何我相謂諸衆生心所證者善男子譬如有人百骸調適忽忘我身四肢弦緩攝養乖方微加針艾則知有我我故證取方現我體善男子其心乃至證於如來畢竟了知清淨涅

槃皆是我相善男子云何人相謂諸衆生心悟證者善男子悟有我者不復認我所悟非我悟亦如是悟已超過一切證者悉為人相善男子其心乃至圓悟涅槃俱是我者心存少悟備殫證理皆名人相善男子云何衆生相謂諸衆生心自證悟所不及者善男子譬如有人作如是言我是衆生則知彼人說衆生者非我非彼云何非我我是衆生則非是我云何非彼我是衆生非彼我故善男子但諸衆生了證了悟皆為我人而我人相所不及者存有所了名衆生相善男子云何壽命相謂諸衆生心照清淨覺所了者一切業智所不自見猶如命根善男子若心照見一切覺者皆為虛垢覺所覺者不離塵故如湯銷冰無別有冰知冰消者存我覺我亦復如是善男子末世衆生不了四相雖經多劫勤苦修道但名有為終不能成一切聖果是故名爲正法末世何以故認一切我爲涅槃故有證有悟名成就故譬如有人認賊爲子其家財寶終不成就何以故有我愛者亦愛涅槃

伏我愛根爲涅槃相有憎我者亦憎生死不知愛者真生死故別憎生死名不解脫云何當知法不解脫善男子彼末世衆生習苦提者以已微證爲自清淨猶未能盡我相根本若復有人讚歎彼法即生歡喜便欲濟度若復誹謗彼所得者便生瞋恨則知我相堅固執持潛伏藏識遊戲諸根曾不間斷善男子彼修道者不除我相是故不能入清淨覺善男子若知我空無毀我者有我說法我未斷故衆生壽命亦復如是善男子末世衆生說病爲法是故名爲可憐憫者雖勤精進增益諸病是故不能入清淨覺善男子末世衆生不了四相以如來解及所行處爲自修行終不成就或有衆生未得謂得未證謂證見勝進者心生嫉妬由彼衆生未斷我愛是故不能入清淨覺善男子末世衆生希望成道無令求悟唯益多聞增長我見但當精勤降伏煩惱起大勇猛未得令得未斷今斷貪瞋愛慢諂曲嫉妬對境不生彼我恩愛一切寂滅佛說是人漸次成就求善知識不墮邪見若

於所求別生憎愛則不能入清淨覺海爾時世尊欲重宣此義而說偈言

淨業汝當知 一切諸眾生 皆由執我愛

無始妄流轉 未除四種相 不得成菩提

愛憎生於心 諂曲存諸念 是故多迷悶

不能入覺城 若能歸悟剎 先去貪瞋癡

法愛不存心 漸次可成就 我身本不有

憎愛何由生 此人求善友 終不墮邪見

所求別生心 究竟非成就

於是普覺菩薩在大眾中即從座起頂禮佛

足右繞三匝長跪叉手而白佛言大悲世尊

快說禪病令諸大眾得未曾有心意蕩然獲

大安隱世尊末世眾生去佛漸遠賢聖隱伏

邪法增熾使諸眾生求何等入依何等法行

何等行除去何病云何發心令彼羣盲不墮

邪見作是語已五體投地如是三請終而復

始爾時世尊告普覺菩薩言善哉善哉善哉善哉

子汝等乃能諮問如來如是修行能施末世

一切眾生無畏道眼令彼眾生得成聖道汝

今諦聽當為汝說時普覺菩薩奉教歡喜及

諸大眾默然而聽善男子末世眾生將發大

心求善知識欲修行者當求一切正知見人

心不住相不著聲聞緣覺境界雖現塵勞心

恒清淨示有諸過讚歎梵行不令眾生入不

律儀求如是人即得成就阿耨多羅三藐三

菩提末世眾生見如是人應當供養不惜身

命彼善知識四威儀中常現清淨乃至示現

種種過患心無憍慢況復博財妻子眷屬若

善男子於彼善友不起惡念即能究竟成就

正覺心華發明照十方刹善男子彼善知識

所證妙法應離四病云何四病一者作病若

復有人作如是言我於本心作種種行欲求

圓覺彼圓覺性非作得故說名為病二者任

病若復有人作如是言我等今者不斷生死

不求涅槃涅槃生死無起滅念任彼一切隨

諸法性欲求圓覺彼圓覺性非任有故說名

為病三者止病若復有人作如是言我今自

心永息諸念得一切性寂然平等欲求圓覺

彼圓覺性非止合故說名為病四者滅病若

復有人作如是言我今永斷一切煩惱身心

畢竟空無所有何況根塵虛妄境界一切永

寂欲求圓覺彼圓覺性非寂相故說名為病

離四病者則知清淨作是觀者名為正觀若

他觀者名為邪觀善男子末世眾生欲修行

者應當盡命供養善友事善知識彼善知識

欲來親近應斷憍慢若復遠離應斷瞋恨現

逆順境猶如虛空了知身心畢竟平等與諸

眾生同體無異如是修行方入圓覺善男子

末世眾生不得成道由有無始自他憎愛一

切種子故未解脫若復有人觀彼怨家如已

父母心無有二即除諸病於諸法中自他憎

愛亦復如是善男子末世眾生欲求圓覺應

當發心作如是言盡於虛空一切眾生我皆

令入究竟圓覺於圓覺中無取覺者除彼我

人一切諸相如是發心不墮邪見爾時世尊

欲重宣此義而說偈言

普覺汝當知 末世諸眾生 欲求善知識

應當求正見 心遠二乘者 法中除四病

謂作止任滅 親近無憍慢 遠離無瞋恨

見種種境界 心當生希有 還如佛出世